

АКАФИСТ ПРЕСВЯТОЙ БОГОРОДИЦЕ, ЗАСТУПНИЦЕ И ПРЕБЛАГОЙ ПОПЕЧИТЕЛЬНИЦЕ О ЦЕРКВИ ХРИСТОВОЙ

Кондак 1

Взбранной Воеводе, Слово Отчее в ложеснах Своих вместившей и, яко Святая Святых сущи, Церкви Зиждителя миру рождшей, души же праведныя, аки крины присно цветущи, от земли Богу собирающей, благодарственная восписуем Ти раби Твои, Богородице: Ты же, яко Царица, от Твоея утробы возсиявшего Царя и Владыки одесную предстоящи и к Нему Матернее дерзновение имущи, Церкви Святей благостояния и дний мирных испроси, нас же от всяких бед и напастей избави и наследники Царствия Небеснаго сотвори, да зовем Ти: Радуйся, Мати Христа Жизнодавца, Церкви Святыя радости и утверждение.

Икос 1

Архангел Гавриил радость велию — спасение рода человеческого предвозвещая, и Тебе, верою глагол Божий восприявшую, быти Материю Церкви Зиждителя, от веков избранную и Духом Святым освященную, всему миру возвести, и сице первую верную Церкви Христовой Тя показа. Мы же познахом Тя, Пречистый Храме Спасов и Кивоте молитв Всесвятейший, — веры основание непоколебимое и в земных испытаниях надежду несокрушимую имущи, со умилением сердечным взываем Ти: Радуйся, Богом избранная Скиние, Невместимаго вместившая; Радуйся, Мати Истиннаго Живота, праматерь Еву от клятвы древния разрешившая. Радуйся, земле ненасеянная, плод бессмертия миру прозябшая; Радуйся, Духом Святым овеянная, Слово Отчее во утробу Свою приявшая. Радуйся, верою во глагол Божий основание Церкви Сына Твоего положившая; Радуйся, изволившая быти Материю Христа грядущаго, сбытие нашего спасения усовершившая. Радуйся, Ветхаго Денми — младенст-вовавшаго плотию израстившая; Радуйся, Сретению Сего, устами Праведнаго Симеона, вся вселенная возвеселися. Радуйся, Мати Христа Жизнодавца, Церкви Святыя радости и утверждение.

Кондак 2

Видящи Тя, Деви Чистая, водни тыя в Горняя со тщанием пришедшую, южика Твоя Елисавет исполнися Духа Свята, и возопи гласом велиим и рече: Благословенна Ты в женах, и благословен плод чрева Твоего. И откуда мне сие, да прииде Мати Господа моего ко мне? Се бо, яко бысть глас целования Твоего во ушню мою, възграся младенец радощами во чреве моем: и блаженна веровавшая, яко будет совершение глаголаным Ей от Господа. Мы же, Чистая, таинство на Тебе от века явленное познахом, со Предтечею верою сердец наших

взыграхом, да яко Матерь Церкви Основоположника, ублажим Тя со всеми роды, вопиюще о Тебе Богу: Аллилуиа.

Икос 2

Разумом несовершенным с праведным Иосифом Обручником Таинство дивное разумети ищуще, на скорбнем пути Твоем во Египет с ним Тебе послужити изыдохом, да узрим и уразумеем: како Агнца Божия от зверя люта — Ирода злочестиваго спасла еси, и сице Церкви Зиждителя на радость всему миру сохранила еси, Пречистая. Понеже Тебе ради, Света от Света, Отчаго Сияния, всю тварь просветившаго и Собою мир спасшаго, не лишихомся, благодатное наследие Сего — Церковь Его Святую, рай земный, верою сохранить потщимся, Тебе же — Святому Кивоту Ея взывающе: Радуйся, Храме одушевленный, Агнца Божия пречистое жилище: Радуйся, Божественный Кивоте, даров Духа Святаго вместилище. Радуйся, Двере славная, Еюже Господь в мир вниде; Радуйся, Обрадованная, чрез Тебе Дух Святыи на Церковь Христову сниде. Радуйся, Мати Благосердная, Отроча Младо от рук Ирода Спасшая; Радуйся, Источнице любви и благодати, печали мира сего на Себе взявшая. Радуйся, любовью сердца Твоего Спасителя мира согревшая; Радуйся, тою же любовью род человеческий с Ним возлюбившая. Радуйся, Мати Христа Жизнодавца, Церкви Святыя радости и утверждение.

Кондак 3

Сила Вышняго, осенившая Тя, Пречистая Дево, и наитием Святаго Духа Материю Сына Божия избравшая Тя, на всяко лето, в праздник пасхи, во Иерусалим, Пасху Нову Неизреченную — Отрока Иисуса к подвигу крестному у Святаго Святыи освящаются, во еже за спасение мира пожрети, Матерним попечением провождати укрепляше Тя. Да тако и родительницы земнии, Твоей Матерней любви подражающе, чад своих в храме Божиим освящают, и Единому Богу пожрети приведут; и, достояние Святыи Церкви Христовы тем умножающе, достохвально вопиют Богу: Аллилуиа.

Икос 3

Имущи Матернюю любовь к людем, Владычице Всеблагая, на браце в Кане Галилейстей, вину недоставшу, во отраду велением Матерним первое чудо сотворити Сына и Бога Твоего умолила еси. Он же, аще и не прииде час Его — веление Отчее, послушания ради Матерния молитвы Твоея, во спасение наше сие сотвори, благословением Божественным церковь домашнюю утвердив, да уразумеем добротворную кротость послушания родителем своим и благодатную силу пред Богом пречистых молитв Твоих, и вопием Ти неложно: Радуйся, Мати Предвечнаго Слова, и о мире усердная Молитвеннице; Радуйся, Венче Божия славы, и Святыи Церкви Покровительнице. Радуйся, многоименитая Дево, Ангелы певаемая и пророки превозносимая; Радуйся, Апостолов благословение и святыи исповедников сило неборимая, Радуйся, молитвою Твоею церковь домашнюю благословением Божиим венчающая; Радуйся, Лозо, Вино безсмертия

источившая, в горестех земных нас улаждающая. Радуйся, ярость духа злобы поднебесныя на Церковь Христову поражающая; Радуйся, от козней и лукавства сего верных избавляющая. Радуйся, Мати Христа Жизнодавца, Церкви Святыя радости и утверждение.

Кондак 4

Буря недоумения смущает ми ум: како дерзну недостойными усты сладце воспети неизреченныя земныя подвиги Твоя, Богомати и Владычице? Видяще Тя у Креста Сына и Бога Твоего, священнодейственно Плоть и Кровь Свою за искупление мира приносящаго, утробою Матернею терзающуся и с Ним за мир сраспинающуся, основание Церкви Христовой Агнчей Кровию и Твоими слезными молитвами, во спасение всех освящающу, — содрогаемся сердцем и душею, умильно поюще о Тебе Богу: Аллилуиа.

Икос 4

Слышан бысть глас стенания Твоего, Пречистая Дево Мати, зрящей Агнца Божия на Кресте закланна и во гроб полагаема, рыданьми вопиющей: О Боже и Слове! О радости Моя! Какое претерплю вольное Твое погребение? Не закосни, Жизнь, в мертвых, но возсияй светлейше, Спасе, яко Бог, отложив старость плотскую, умерщвленныя человеки оживив и воскресив их во славе Отчей! О сем, Всеблагая, с жены-мироносицы, Иосифом благообразным, и праведным Никодимом, и Апостолы святыми, и мы благодарне вопием Ти: Радуйся, утробою прободаема, грех праотцев истребившая; Радуйся, печальми терзаема, грехи мира слезами омывшая. Радуйся, печать девства цело сохраняющая и заклепы адовы сломившая; Радуйся, первая, зело рано у гроба, “ Радуйтесь!” от Господа Воскресшаго услышавшая. Радуйся, Жизнь во гробе положившая, смерти державу разорившая; Радуйся, востанием Рождества Твоего, Церковь завета Новаго во спасение миру воздвигшая. Радуйся, якоже Сына Твоего во гробе, Церковь Святую в напастех не оставляющая; Радуйся, волнами житейскими Сию обуреваему, миром ограждающая. Радуйся, Мати Христа Жизнодавца, Церкви Святыя радости и утверждение.

Кондак 5

Боготочный Источник превеликих милостей явилася еси роду христианскому, неискусобрачная Дево Марие: Егоже родила еси, недр Отческих не отступльше, пленив Крестом Своим смерть, воскресе тридневен и паки възиде идеже бе первее, обожив род человеческий. Тебе же, матеродевственную славу, Матерь Света и источник любви неизреченныя всей Церкви дарова, да в горестех земных и напастех житейских имеют Тя прибежище священное и благоутешное вси вопиующии о Тебе Богу: Аллилуиа.

Икос 5

Видяще Тя, Марие, Мати Иисусова, ученицы Христовы по восходе Сына Твоего к Отцу Своему Небесному, с ними пребывающую, и в чаянии Утешителя Духа Истины благодатно их приуготовляющую, всяку скорбь на них находящую, и печали житейския нивочтоже вменяху, к устройению Церкви Христовы укрепляхуся. Тако, паче лучь солнечных их согревающи, Церковь Сына Твоего всячески устраяла еси и молитвою теплою зерно горушично в древо Жизни возвращала еси. Мы же, Кивоту святыни Твоя припадающе, умильно зовем Ти: Радуйся, рясны златыми одеяна и Божественною лепотою украшенная; Радуйся, силою Духа Святаго овеванная и превыше Ангел облагодатствованная. Радуйся, подвигом Твоим Небо и земля велегласно торжествуют; Радуйся, красотою девства Твоего Церковь Божия присно велелепствует. Радуйся, о Тебе бо Церковь Христова дарами Святаго Духа снабдевается; Радуйся, Заступнице незримая, Еюже подвиг веры освящается. Радуйся, Голубице Чадолубивая, верных любовию согревающая; Радуйся, воинствующих на Церковь Божию Богомудренно умиротворяющая. Радуйся, Мати Христа Жизнодавца, Церкви Святыя радости и утверждение.

Кондак 6

Исповедует и ликовствует Иерусалим Новый, и радости исполняется апостольское собрание, и вси верою Христу уневестившиися: видяще бо Тя, Богорадованная Владычице, аки просененную Чашу, Божественныя силы и дивныя благодати исполненную, в гонениях на Церковь Христову терпением неослабевающую, в нуждах и лишениях в Бозе веселящуюся — в вере укрепляхуся, Духом же Святым облагодатствовани и Твоим Богоматерним благословением напутствуеми, на подвиг апостольства устремляхуся: от края и до конец земли о Воскресении Христова возвещаху, кровию своею олтари Святыя Церкви освящаху, и с веселием воспеваху Богу: Аллилуиа.

Икос 6

Возсия свет Евангелия Христова по всей вселенной аки облако Божественное в Скинии Завета, показася велелепота Святыни Твоя, Пречистая Богородице. В Тебе бо Единой воздвижеся Господеви знамение непорочныя чистоты, исполнившая Божественною славою Святую Церковь, в нейже людие Божии в пакибытие обновляются, земный едем, грехом оскверненный, раеви уподобляют, и в Тебе упование спасения своего разумеюще, благодарне приносят Ти сицевыя похвалы: Радуйся, в человечестем естестве ангельскую святость сочетавшая; Радуйся, яко Солнце лучезарное, красотою Девства Твоего к Церкви Христовой возсиявшая. Радуйся, Небесное Диво и священное Чудо, превыше небес превозносимая; Радуйся, верными возвеличенная, распявшими же Спасителя поносимая. Радуйся, апостолом сподвижнице и мучеником укрепление; Радуйся, оскорбляемым покровительнице, врагом же их посрамление. Радуйся, притекающим к Тебе всеблагая Помощнице; Радуйся, даров Церкви Небесныя вмести-

тельнице, земная же благодатный Источник. Радуйся, Мати Христа Жизнодавца, Церкви Святыя радости и утверждение.

Кондак 7

Хотя Господь и Церкви Зиждитель повеличати Кивот Священный Своего Божества, от Негоже плоть приим, и Сию священнодейственно о спасении мира Отцу Своему принесе, паки посла Архистратига Божия возвестити Ти, Всенепорочная Мати, о Твоем к Нему отшествии; и егда узре Тя в лоно Церкви Небесныя преславно грядущую, сынолепно душу Твою в руке Свои прият, и пред всеми небесными силами провозгласи: Гряди, Чистая, с Сыном и Богом прославлена буди! С ними же и мы, зряше Тя одесную Славы Божией о нас молящуюся, радующеся, велегласно вопием Богу: Аллилуиа.

Икос 7

Новая благодать излилася на Церковь Христову, егда, яко денница лучезарная, о Мати Божия и Владычице, у Престола Царя Славы предстала еси, идеже от Херувим воспеваемая и от Серафим славимая, с соборы святых руке Свои за род христианский к Богу простираеши, Церкви Святей, Божественною Кровию Сына Твоего воздвигнутой и освященной, до скончания века неодоленной быти умоляеши. Сия же, бурю нестроений терзаема, и огнем злобы адовы палима, о Тебе спасение имущи, верою взывает: Радуйся, яко Святая Святых, превыше небес в Сион горний возведенная; Радуйся, краснейшему паче сынов человеческих, Сыну Своему сопричтенная. Радуйся, Пречистая Мати, Церкви Святыя стено и ограждение; Радуйся, благодати преисполненная, немощных душ наших укрепление. Радуйся, Аффония жестокосердаго, одр Твой устремившагося повергнути, посрамившая; Радуйся, умоленная слезным раскаянием его, бездну милосердия Божия миру отверзшая. Радуйся, Неизглаголанная, источником слез Твоих грехи мира омывающая; Радуйся, Обрадованная, во Успении Твоем нас не оставляющая. Радуйся, Мати Христа Жизнодавца, Церкви Святыя радости и утверждение.

Кондак 8

Странное бе, купно же и радостотворное видение, Мати Божия, егда с ангельскими чины и лики святых пророк и апостол, в славе велией, узре Тя святей Андрей на воздухе, в церкви Влахернстей, молебнии руке к Сыну и Богу за христиане воздевающую, и тако Свой Матерний Покров над всем миром простираючи, Церковь Сына Своего от всех бед и напастей избавляюще. Сице убо, людие Божии Матерь вознесшагося на Небо Христа Жизнодавца Тя познавше, спасение душ своих Тебе вверяют, и под сению благодати Покрова Твоего, радующеся, взывают Богу: Аллилуиа.

Икос 8

Вся небесная и земная хваление Тебе, Милосердная Мати, воспети по достоянию не возмогут, видяще Тя, паче лучь солнечных светящимся Омофором Своим, Церковь и люди покрывающую, и посреде бурь житейских миром ограждающую. Внемлюще о Святей Церкви Твоему Предстательству, и о роде христианством ходатайству. Сыну Твоему припадающе, вопием: О, Всемилостиве Спасе, молитвами без нетления Рождшия Тя, не предаждь достояния Твоего ненавидящим Тя, ниже посрами уповающих на Тя; Тебе же, Пречистая, вопием: Радуйся, Деннице незаходимаго Света, путь к горнему миру освещающая; Радуйся, лучезарная Вратарнице, двери райския верным отверзающая. Радуйся, олтарей святых божественное украшение; Радуйся, ересей и тлетворных расколов непререкаемое посрамление. Радуйся, иерархов верных и истинных пастырей Церкви Святыя благодатное венчание; Радуйся, нерадивых делателей вертограда Христова праведное наказание. Радуйся, любящим благолепие Дому Божия щедрая Мздовоздавательнице; Радуйся, строителей и украсителей храмов Божиих от всех зол Избавительнице. Радуйся, Мати Христа Жизнодавца, Церкви Святыя радости и угверждение.

Кондак 9

Всяческая, яко Мати всех живущих, во ограде Церкви Сына Своего под Покров Свой святы и совокупльши, достояние Сего от всех наветов вражиих ограждаеши. Всепречистая Владычице, и яко над всеми милосердствующая, во утверждение веры надежду на Тя имущих, во всех концах земли источники утешения — святыя иконы Твоя чудесы неложными прославила еси, во еже Матернюю любовь Твою ко всем видяще, аще в единомыслии веры и колеблемы суть, яко чада Единого Бога, о Тебе единими усты поют Ему: Аллилуиа.

Икос 9

Витии многовещаннии недоумеют, киими благодареньми воспети милосердие Твое, Богородице, зряще Тя в горней славе яко Кивот и Престол Господень, идеже предстоят Херувими и Серафими — пред Подвигоположииком Христом, о напастыи обуреваемой Церкви, со умилением, яко Мати, к Сыну и Творцу Своему молящуюся: Царю Небесный, приими всякаго человека, уповающего на Тя, и прослави прославляющих Тя, приемля их слезныя молитвы и стенания, от бед житейских и зол многих избавляя. О, Неизреченная небес Красото, и надежды нашея упование, приими от нас сицевая похвалы: Радуйся, горняго мира присное украшение, Еюже вся небесная воинства радуются; Радуйся, Заступнице мира дольняго, тобою бо вернии Богу усыновляются. Радуйся, благословенная Дщи Отца Небеснаго, Огнь Духа Святаго носящая: Радуйся, благоволения Божия предображение, мольбы всего мира Богу приносящая. Радуйся, дивных знамений Источнице, суд Божий миру возвешающая; Радуйся, явлением чудотворных икон Твоих землю в храм Божий освящающая. Радуйся, от лжепророчества, суеверия и всегубительнаго нечестия верных ограждающая;

Радуйся, в благочестии веры, целомудрии и правде Божией нас укрепляющая. Радуйся, Мати Христа Жизнодавца, Церкви Святыя радости и утверждение.

Кондак 10

Спасти и равноангельскому естеству подобное наследие Божие — души человеческия уготовати хотящи, вертоград Божественный — гору Афонскую в жребий святыи от Сына Твоего восприяла еси, Владычице Пречистая, идеже сонмы подвижников дивных, ангельски в посте и безмолвии зде потрудившихся, аки крины неувядаемыи, девства целомудрием процветшии, Богу уготовила еси, и тако Мати пустынножителей явилася еси. Подвигу же их, ревнующе, мнози, в Тебе надежду имуще, во всех концех вселенныя обители святыя воздвигоша, и ангелоподобнии хоры на земли учредиша, от нихже молитвенное славословие за спасение мира ко Творцу возносится непрестанным гласом: Аллилуиа.

Икос 10

Стена и щит Святыя Церкви еси, Богоневестная Мати, и непоколебимое благостояние Ея, понеже Тобою от напастей вражиих ограждаема, и от стрел духа злобы поднебесныя хранима, яко невеста целомудренная дарами Святаго Духа облагодатствованная, победу Победившаго мир всемирно празднует, сыны Света и наследники вечных благ верныя свои показывает. Сего ради, не отврати тщи, стену небориму в Тебе стяжавших, и спасения своего надежду на Тя возложивших, но Твоими молитвами избави нас от враг видимых и невидимых, от вреда и искушений, да Тобою спасаемы, приносим Ти таковая: Радуйся, мира и согласия в Церкви Христовой благодатная Устроительнице; Радуйся, лжепророков, соблазняющих стадо Христово, грозная Посрамительнице. Радуйся, иерархов, братолюбию ревнующих, смиренномудрием и беззлобием украшающая; Радуйся, сраспинатися молитвою и терпением за овец Христовых им помогающая. Радуйся, Лоно Божественныя чистоты, от него же пастыри Церкви ангельскою порфирию снабдеваются; Радуйся, крине райския красоты, еюже иночествующии к жизни вечней уготовляются. Радуйся, преблагая Благодетельнице, труждающаяся и от мира сего поносимая на пир Агнца Божия собирающая; Радуйся, скорбями в вере не колеблемая венцем блистания неувядаемаго венчающая. Радуйся, Мати Христа Жизнодавца, Церкви Святыя радости и утверждение.

Кондак 11

Пение умиленное приносим Ти, Богородице: Тя бо Церкви Зиждитель, с высоты крестныя, священнодейственно, Преплагословенную Матерь Попечительницу Церкви Святей предначерта, юже от всех наветов вражиих да оградиши, якоже иногда возлюбленный наперсник Христов, предивный Иоанн, пророчески узре Тя на небесех, в солнце облочену и венцем звезд немеркнущих сияющую, верныя же от бед избавляющую. Да не умолкнет во веки священная песнь земнородных, заповеди Божии и свидетельство Христово хранящих и, в брани противу плоти и диавола, о Тебе, Щите непобедимый, благодарно поющих: Аллилуиа.

Икос 11

Светом и сиянием Солнца немеркнушаго наполняема, Церковь Небесная созда себе дом и храм Божества, лепотою Девства Твоего, Дево Чистая, преукрашенный, в немже Премудрость Божия утверди Себе столпов седьмь, иже не подвижится во веки, от негоже всему миру Свет Непрístupный возсия и жизнь вечную дарова. К сему Свету незаходимому приобщитися помози нам, Пречистая, утренюет бо дух наш ко храму святому Твоему, храм же наш телесный весь осквернен. Но Твоими молитвами избави нас от всякия нечистоты, да внидем в чертог небесный, и со всеми воспевающими имя Твое велегласно вопием Ти: Радуйся, лучезарная Деннице, блистанием Света несозданнаго присно сияющая; Радуйся, небесе и земли Царице, венцем звезд немеркнуших блистающая. Радуйся, Серафимов радости и Херувимов преизрядная похвале; Радуйся, постников веселие и кающихся грешников спасительная порфиоро. Радуйся, Мати всех живущих, небесная паче земных желати нас научающая; Радуйся, Кадило благовонное, молитвы Церкви земныя к Престолу Божию возносящая. Радуйся, в час исхода душ наших, верная о нас пред Богом Предстательнице; Радуйся, во втором пришествии Сына Божия неотступная за мир Ходатаице. Радуйся, Мати Христа Жизнодавца, Церкви Святыя радости и утверждение.

Кондак 12

Благодать неизреченная даровася Ти, Мати Божия, во еже живущия в юдоли греха и смерти, чрез врата Церкви земныя, спасенныя Богу привести. О Всеблагая! Егда же приидет день он, и поставятся престолы, и книги разгнутся, и явлена будут все деяния человеков, не забуди убо и нас убогих, но прости руце Твоего Матерняго милосердия ко Всещедрому Богу, да грех ради наших не предани будем диаволу и ангелом его, но Твоим предстательством услышим глас Праведнаго Судии: приидите благословеннии Отца Моего, наследуйте уготованное вам Царствие от сложения мира; да со всеми, верно послужившими Богу, воспоем ангельскую песнь: Аллилуиа.

Икос 12

Зряще с Тайновидцем грядущее торжество Церкви Небесныя, идеже Господь Бог Вседержитель Храм ея, и Агнец, и Светильник ея, о Тебе радуемся, Дево Чистая, видяще Тя со Предтечею и Богословом, яко Невесту преизрядную и лепотою девства преукрашенную, одесную славы Агнца Божия сидящую, идеже ничтоже скверно и нечисто не вниде. Страшный же день Судный помышляюще, со трепетом душевным молим Тя: прежде даже двери не затворит чертога Господь, предвари, Пречистая, ходатайством Твоим о праотцах и отцах наших, от лет древних в вере скончавшихся, и нас не оставляющи, да огня негасимаго избавльшеся, избранницы Агнца Божия будем, вопиющи Ти таковая: Радуйся, Мати Милующая, в земных испытаниих нас не оставляющая; Радуйся, в юдоли греха и смерти живущих чрез Церковь Христову к торжеству жизни вечныя приводящая. Радуйся, святых храмов Божиих Покрове и ограждение; Радуйся, христианских подвижников веры и благочестия незримое укрепление.

Радуйся, Надеждо наша Святая, егда пред Лицем Божиим предстанут вси народи; Радуйся, горних сил Владычице, вводящая души верных в небесныя чертоги. Радуйся, яко прибегающии под святыи Покров Твой в день Судный не постыдятся; Радуйся, яко вверяющии Тебе спасение душ своих, пред Сыном Твоим Тобою прославятся. Радуйся, Мати Христа Жизнодавца, Церкви Святыя радости и утверждение.

Кондак 13

О Всепетая Мати, Духом святым Богокованный Кивоте и одушевленный Храме Христа Бога нашего, дивно облиставшая Церковь Небесную порфирию Твоя Девственныя чистоты! Тебе припадающе, молимся: утверди, Светоносная, Православную веру воистину Богородицу Тя исповедующих, Церковь Сына и Бога Твоего невредиму и адовыми враты до скончания века неодолиму соблюди, любящих же благолепие ея в торжество Церкви Небесныя введи, да егда Тя узрим одесную судити всему миру Грядущаго, ниже постыдимся, ниже посрамимся, но Твоим Матерним предстательством сподобимся со всеми святыми воспевати Царю Сил победную песнь: Аллилуиа.

(Этот кондак читается трижды, затем икос и кондак 1)